

Na osnovu člana 7.5. Zakona o prijenosu, regulatoru i operatoru sistema električne energije u Bosni i Hercegovini (“Službeni glasnik BiH”, broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju (“Službeni glasnik BiH”, broj 2/05) i člana 51. stav 7. Pravilnika o licencama – Prečišćeni tekst (“Službeni glasnik BiH”, broj 63/16), po službenoj dužnosti, na sjednici Državne regulatorne komisije za električnu energiju, održanoj 17. jula 2024. godine, donijeta je

ODLUKA

O SUSPENZIJI PRIVREMENE LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

1. Pravnom licu “Medoš One” d.o.o., Banja Luka, suspendira se privremena licenca za obavljanje djelatnosti međunarodne trgovine električnom energijom, registracijskog broja 05-28-12-326-18/22 od 22. februara 2023. godine, izdata na period od 23. februara 2023. godine do 22. februara 2025. godine.
2. Privremena licenca iz tačke 1. ove Odluke suspendira se počev od 18. jula 2024. godine do 22. februara 2025. godine ili do dostavljanja dokaza o ispunjavanju uvjeta i kriterija propisanih regulatornim pravilima i propisima.
3. Za vrijeme trajanja suspenzije, pravno lice iz tačke 1. ove Odluke nema obavezu plaćanja regulatorne naknade.
4. Ova Odluka stupa na snagu danom donošenja, a njen dispozitiv bit će objavljen u “Službenom glasniku BiH” i službenim glasilima entiteta.

Obrazloženje

Pravno lice “Medoš One” d.o.o., Banja Luka (u daljnjem tekstu: vlasnik privremene licence), posjeduje privremenu licencu za obavljanje djelatnosti međunarodne trgovine električnom energijom, izdate Odlukom Državne regulatorne komisije za električnu energiju (u daljnjem tekstu: DERK) broj 05-28-12-326-17/22 od 22. februara 2023. godine na period od 23. februara 2023. godine do 22. februara 2025. godine, registracijskog broja 05-28-12-326-17/22.

Odredbama člana 30. stav 1. tačka e) Pravilnika o licencama – Prečišćeni tekst (“Službeni glasnik BiH”, broj 63/16), kao jedan od posebnih kriterija za izdavanje licence za obavljanje djelatnosti međunarodne trgovine električnom energijom, propisano je da podnosilac zahtjeva za izdavanje licence mora dokazati da su ostvarene pretpostavke za izdavanje odgovarajuće licence Regulatorne komisije za energiju u Federaciji Bosne i Hercegovine (FERK) ili Regulatorne komisije za energetiku Republike Srpske (RERS).

Tokom provođenja postupka za izdavanje gore pomenute licence, ovaj poseban kriterij je bio ispunjen, odnosno u vrijeme izdavanja privremene licence za obavljanje djelatnosti međunarodne trgovine električnom energijom, vlasnik privremene licence je ishodovao licencu RERS-a za snabdijevanje i trgovinu električnom energijom u trajanju od dvije godine, počev od 7. jula 2022. godine.

Tačkom 2.1. Standardnih uvjeta za korištenje licence za obavljanje djelatnosti međunarodne trgovine električnom energijom (“Službeni glasnik BiH”, broj 14/16) propisano je da je vlasnik licence, tokom njenog korištenja, dužan permanentno ispunjavati opće i specifične kriterije utvrđene Pravilnikom o licencama, na osnovu kojih mu je licenca i izdata, te o tome DERK-u podnositi odgovarajuće dokaze.

Međutim, aktom RERS-a broj 01-583-6/24 od 8. jula 2024. godine, DERK je obaviješten da je pravnom licu “Medoš One” d.o.o., Banja Luka, istekla dozvola za obavljanje djelatnosti

snabdijevanja i trgovine električnom energijom, koju je RERS izdao Rješenjem broj 01-284-8/22/P-42-228 od 7. jula 2022. godine, na period od dvije godine.

Istekom dozvole entitetskog regulatora, vlasnik privremene licence prestao je ispunjavati poseban kriterij predviđen članom 30. stav 1. tačka e) Pravilnika o licencama, odnosno obavezu utvrđenu tačkom 2.1. Standardnih uvjeta za korištenje licence za obavljanje djelatnosti međunarodne trgovine električnom energijom, a nije ispunio ni obavezu stipuliranu tačkom 2.20. Standardnih uvjeta, koja nalaže informiranje DERK-a o svim promjenama koje se tiču dozvola relevantnih entitetskih komisija, imajući u vidu da o isteku dozvole entitetskog regulatora DERK nije obaviješten od strane vlasnike privremene licence.

Pored navedenog, Rješenjem o plaćanju regulatorne naknade za 2024. godinu broj 05-28-12-286-23/24 od 3. januara 2024. godine, pravnom licu "Medoš One" d.o.o., Banja Luka, naloženo je plaćanje regulatorne naknade u ukupnom iznosu od 30.000,00 KM, koja se plaća kvartalno unaprijed, u četiri jednaka dijela. Postupajući po navedenom Rješenju, vlasnik privremene licence je platio regulatornu naknadu za prvi i drugi kvartal 2024. godinu, ali do dana donošenja ove Odluke, regulatorna naknada za treći kvartal 2024. godine u iznosu od 7.500,00 KM nije plaćena, iako je krajnji rok za plaćanje bio 30. juni 2024. godine.

Imajući to u vidu, kao i odredbe člana 51. stav 7. Pravilnika o licencama, koje omogućavaju DERK-u suspendiranje licence bez obavljanja javne rasprave u slučaju naročitih kršenja odredbi uvjeta za korištenje licence ili propuštanja plaćanja regulatorne naknade, odlučeno je kao u dispozitivu ove Odluke.

Suspendizija, u skladu s članom 51. stav 5. Pravilnika o licencama, može biti ukinuta ukoliko vlasnik privremene licence ispuni zahtijevane uvjete, odnosno, u konkretnom slučaju, dokaže da su ostvarene pretpostavke za izdavanje nove dozvole entitetskog regulatora, te izmiri dugovanja po osnovu regulatorne naknade.

Kako se privremena licenca suspendira tokom trećeg kvartala 2024. godine, počev od 18. jula 2024. godine, to neizmirene obaveze vlasnika privremene licence za treći kvartal 2024. godine ne iznose 7.500,00 KM, kako je to ranije utvrđeno Rješenjem o plaćanju regulatorne naknade za 2024. godinu, nego 1.370,97 KM, te ne postoji obaveza plaćanja regulatorne naknade za četvrti kvartal 2024. godine.

U skladu s članom 9.2. Zakona o prijenosu, regulatoru i operatoru sistema električne energije u Bosni i Hercegovini, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-270-1/24
17. jula 2024. godine
Tuzla

Predsjedavajuća Komisije

Branislava MILEKIĆ